

ZENICA Sudanci na Metalurškom institutu "Kemal Kapetanović"

Tromjesečna obuka inženjera mašinstva

Ovi mladi ljudi bit će pioniri metalurgije u svojoj zemlji, kaže direktor Rimac

Nakon prošlogodišnjeg potpisa ugovora i avansne uplate od 92.000 eura, na zenički Metalurški institut „Kemal Kapetanović“ stiglo je 14 sudanskih inženjera mašinstva koji bi, nakon tromjesečne obuke, trebali biti obučeni za rad na Institutu za materijale u Kartumu.

Važna zadaća

Sudanska strana će do kraja obuke uplatiti i drugu ratu u istom iznosu, što je poprilična finansijska injekcija za ovu ustanovu, koja je članica Univerziteta u Zenici i koja ima 100 zaposlenih.

- Ovi mladi ljudi bit će pioniri metalurgije u svojoj zemlji, a mi smo ponosni što nam je, između brojnih evropskih instituta, pripala čast i obaveza da ih i pripremimo za tu važnu zadaću. Naš je plan i organizirati studij metalurgije, ili kod nas u Zenici ili u Kartumu -



Priprema Sudanaca za rad na Institutu u Kartumu

ističe direktor mr. Milan Rimac.

Svaki Sudanac ima svog

trenera, koji su također mladi ljudi, a predvodi ih koordinator mr. Omer Beganović (43).

- Prijerata, obuku su mogli obavljati samo stariji stručnjaci, od 50 do 60 godina, ali mi smo se odlučili priključiti mlađim ljudima, koji su je u potpunosti iskoristili - kaže Rimac.

Idealan partner

Koordinator Beganović ističe da je ovo prva od pet faza, u koliko će teći obuka, izgradnja i opremanje institu-

ta u Kartumu, za koji će dio opreme isporučiti i bosanske firme, a stručne-konsultantske usluge pružiti zenički institut. Već naredne godine u sklopu projekta će obučiti i sudanske stručnjake za oblast nemetalnih materijala.

- Zeničko-dobojski kanton idealan je partner za Sudan, jer, zbog velikog rudnog bogatstva, imaju potrebu za iskustvima naših stručnjaka, zatim za drvetom, hranom... - ističe Rimac.

V.BEGUNIĆ

Priprema pet doktorata

Zenički institut trenutno nema zaposlenog nijednog doktora nauka, što je, i zbog 52. godišnje tradicije, referenca na koju ne mogu biti ponosni. Međutim, ističe Rimac, do kraja godine će se promijeniti situacija i u vezi s tim.

- Već 5. jula doktorsku disertaciju će braniti ja, a do kraja godine će to učiniti i kolega Beganović, koji će uskoro postati moj pomoćnik za naučnoistraživački rad. Doktorate završavaju i Mustafa Hadžalić, Belma Fakić i Behar Alić - ističe Rimac.